

本朝分省人物考

人物考卷之三十九目錄

南直隸池州府

陳敬宗

黃觀

鄭景曜

胡本惠

孫仁

陳輕

張廷瑞

李廷章

許潛

胡森

柯相

宋邦輔

李呈祥

柯喬

徐紳

畢鏘

李一元

施堯臣

余毅中

章時鸞

李嘉祥

潘大承

丁旦

楊日森

周聘

廖廷皓

補遺

柯暹

張輝

王應乾

方新

目錄終

本朝京省人物考卷之三十九

南直隸池州府

陳敬宗

陳敬宗貴池人洪武乙丑進士授刑科給事中永樂  
初論時政爲陳夷齊推遜之心胡虜背服之機董子  
正心之論謫鄞縣丞峭直愈厲未幾以極諫死已祀  
府祠

黃觀

黃觀字濶伯一字尚賓貴池縣人父贅在城許氏生  
觀遂從其姓少以書補邑庠生嘗築翠微書舍讀書

其間受業於元翰林侍制黃暉觀益慷慨砥礪以忠義自許洪武甲子應貢入太學卽發解京府尋罹外艱戊辰十月起復仍入監造詣益深嘗繪父母像爲圖携以自隨閱之淚下明年會試第一廷對禦戎策大要以天道福善禍淫之機人事練兵講武之法爲言高廟嘉之擢狀元及第時年二十八除翰林修撰日侍御前敷奏明爽上甚眷重每賜顧問命編寫省貪錄又以其有政事才凡法司諸榜文令撰成卽書之又令清理軍職貼黃兼管註銷諸司按牘二十九  
十九年陞上寶司卿未幾擢禮部右侍郎建文元年

改官制增設左右侍中員次尚書遷爲禮部侍中仍  
兼尚寶司卿始奏復黃姓與方孝儒等日見親用靖  
難師起 成廟自軍中來請誅齊泰黃子澄二人以  
息兵觀奉命當制諷其散軍歸藩或束身謝 孝陵  
辭涉詆斥時北兵已至平原明年渡淮觀往上游諸  
郡徵兵入援奮不顧身且行且募兵至安慶 成廟  
已過江矣下令諭京城軍民暴左班文職奸臣罪狀  
觀名第六而羣民推戴 成廟卽位索寶不知所在  
或言黃觀取寶已赴上游起兵矣卽命有司追捕沒  
入家資收其妻翁氏并二女給配象奴初觀駐安慶

聞變慟哭謂友曰吾妻素有志節必不受辱越明日其家僮自京逃來言狀是日翁氏果被象奴叱出金銀釵釧之屬市酒餼以供合歡之費佯順諾悉解與持去奴既出戶卽乘間率二女及家屬二人俱赴淮清橋下死觀遂招魂葬之江上次李陽河聞報者曰上已出奔過池之建德而羣臣奉新皇帝卽位今三日矣觀自分大事已去力不能支乃朝服東向再拜於羅釵磯湍急處始舟人奮棹佯爲洩解投水而死舟人急以勾挽之僅得珠絲棕帽後追捕者得之以獻命購其屍不獲疑有匿之者遂族觀家且逮其

姻黨者百餘人詔繫獄 仁廟初悉放還其發戍邊  
徼者又數十人景泰中進士邑人徐仁使遼有老卒  
朱黻給事公館亦以觀累戍邊者黻故爲諸生嘗從  
觀遊問舊事且泣且言甚詳翁氏池口人沒時有黻  
其屍并二女具棺斂以待 朝命不報天順池中人  
至南京柳林破棺猶有存者詢之父老咸曰此黃狀  
元妻女云郡人柯暹曾作觀傳匿不示人近清江龔  
守愚知貴池始於學宮西徧卽其故址立祠祀之今  
有闡幽集刻其試文革除錄云初郡縣爲建狀元坊  
隨以培獨存其扁於故家後議復建乃有持以獻者



人咸驚異云今金陵賽工橋亦有翁夫人暨二女墓  
蓋夫人及二女死時屍流至此土人憐而藁葬萬曆  
癸卯青陽施益臣始爲封樹立祠請於京兆春秋祀  
不絕云又南禮部建黃公祠于文德橋之左皆前左  
侍郎臺山葉公題額

鄭景曜

鄭景曜建德人永樂甲申進士授監察御史勁直有  
聲按遼東不避權宦察奸臣儲欽巫愷等人皆危之  
曜曰苟利社稷生死以之遑恤其他陞貴州左叅政  
奉命征筭子坪有功 朝廷優賞後致仕

胡本惠

胡本惠銅陵人正統舉人任戶部主事陞南昌知府簡徭輕賦興學課士政多宜民遷左布政轉左擢右副都御史有德量時稱長者致仕歸里林臥二十年享年八十有九賜祭葬如制

孫仁

孫仁字世榮貴池人仁自幼器識不凡爲郡庠弟子員郡博及守貳每賓禮之提學侍御孫公屬有司訪求諸生中有德行者置德行簿註名其上仁得孝弟忠信四字正統丁卯舉於鄉景泰辛未第進士奉使

稽永平山海邊餉賜白金勞之明年授南京戶部主事天順丁丑改工部提督濟寧等關庚辰調戶部督糧於畿郡監收於京倉所至俱有條理大司徒張公都憲軒公雅重之癸未擢知順慶府二公深惜其去中道丁憂杜門讀禮服闋未上改西安府治行異等人吏悅服成化戊子固原變作王師遠討供億實繁仁內理郡事外給軍餉百爾徵需未嘗乏缺賊平之後優詔獎勵癸巳遷右叅政所部涇陽縣舊有洪口堰山高水下不利灌溉至是鑿山開道人咸異之明年督修邊牆以禦外侮二役雖都憲余公爲之經畫

而周旋從事實仁之績也丙申晉右布政使時流民  
移聚漢中荆襄間渙無所統都憲原公奉詔撫安之  
仁贊襄其事輯寧是圖不忍驅殺已而議設白河諸  
縣編藉以居至今安堵明年轉左布政使又明年擢  
右副都御史巡撫蜀地先是孝感張瓚蒞蜀挾才喜  
事屢造邊釁人多苦之聞仁先聲私相慶幸比至簡  
重沉靜與民更始嚴無峭刻寬無縱弛松茂羗人憑  
險出沒阻絕餉道時時召其酋長諭以朝廷威德後  
更抄掠聲罪討之渠魁授首居人以安前後受詔獎  
諭者五有白金綵幣之賜凡地廣事繁僻近蠻夷州

縣皆分地立縣或陞爲州或易置長吏以臨之己亥  
叙慶諸郡歲穀不登輒取公帑賑卹之且復其家二  
年招集流亡多所全活待士大夫極有禮義宋學士  
景濂墓在蜀郡城東門外爲山水所嚙公命有司遷  
葬且存恤其後人在蜀八年凡其所行皆可稱述乙  
巳召爲戶部左侍郎尋請骸骨歸復蒙恩詔晉階二  
品典刑鄉里未踰年卒

陳 輅

陳輅青陽人天順甲申進士任南京刑部主事決獄  
詳允庭中稱平爲閩憲勞心公務力彌民患隨節所

駐有聲時渾南宿寇竊發帥兵討平之凱旋卒于瘴  
疫歸視惟圖書數卷而已

張廷瑞

張廷瑞貴池人領天順壬午鄉薦任龍泉知縣其治  
民也若理家政纖細畢舉於閭閻老稚無不盡之心  
善政惠人生民樂業至今廟祀之擢監察御史清理  
屯田盡革中璫侵占之弊軍屯感德累封言時政有  
聲憲臺

李廷章

李廷章石埭人成化丙戌進士授南京刑部主事歷

官雲南副使恩威兼至番夷信服時土司倡變不煩  
兵刃立擒元惡境地以寧疏邊務六事多所施行尋  
以疾乞休致政家居杜門自守

許潛

許潛貴池人弘治己未進士授行人轉監察御史剛  
正不阿犯顏直諫嘗監內帑權璫斂避凡朝廷大政  
人所不敢言者潛侃侃陳之不顧忌諱一時稱名御  
史云

胡森

胡森字秀夫別號未齋清陽人自幼英特迥邁不凡

幼齡入黌宮博究羣書爲文雋拔領正德丙子鄉薦  
庚辰中式禮闈越辛巳賜進士第授南京刑部主事  
繼陟本部員外郎明察廉平寬惠信決平富民沈氏  
之訟父子兄弟咸輸其情聽訟之中教化行焉察鑄  
錢之私併得假官之狀請託之杜摘伏神焉告視事  
一月囹圄幾空不激不隨有學有守遷吏部稽勳司  
郎中再轉考功廣詢博訪誓心秉公於是大禮議起  
矢議諸臣皆就外補執政欲追前尤爲從容回幹士  
類藉以保全太僕卿楊公時爲寧波守以剛方忤部  
使被論獨爲之解釋復奏卒以忠諫顯有憲司在議



黜例者首相欲私庇之竟黜之不少貸考績事竣歷  
轉文選司郎中明揚側陋惟其賢不惟其類辟引善  
類斥罷貪庸士途爲之一清陞南京太常寺少卿時  
有祀典明禋之疏求無愧於天理民彝之極已署光  
祿寺印華厨役之濫輸省廩孽之冗費却署官之餘  
金不以非其職掌而漫不事事者癸巳北補太常少  
卿提督四夷館官階清要士民傾心無何以內艱去  
任扶柩歸葬結廬墓側安禮備至服闋筑筑在疚四  
期始起赴京又以靳於請謁忤首相補南京鴻臚寺  
卿局閑事省減去直役時與渭涯霍公泰泉黃公東

郭鄒公泉亭吳公談說理學講明國是以需大用因  
災異許令自陳三疏乞休遂得致仕嗣後內外交薦  
皆不報大中丞歐陽公必進雖有特疏之薦而高尚  
之志決矣躬飭粥調藥餌養封君中憲公又十餘年  
壽躋大耋而卒年亦邁矣而哀慟居廬動必如禮營  
基建祠皆親課弗懈又聿追前孝家廟之在青陽者  
皆修葺而拓其基焉餘惟杜門九峰韜養自晦優游  
林下者凡二十餘年而卒

### 柯相

柯相貴池人字元卿號獅山正德丁丑進士知吉安

永新值逆濠反督府王守仁吉守伍文定舉義師相  
集兵三千隸守仁而身居守事平守仁以首功六級  
與相辭不受後丁艱補商河歲饑賑濟有方全活甚  
衆既爲南吏科給事中劾去官邪數十裁省內府暨  
諸司庫藏鉅萬尋遷藩臬巡撫陝西河南改督兩廣  
未赴歸撫陝西時爲築臯蘭邊牆三百里虜俺答不  
敢犯後論功遣官賜金帛于家相爲人剛正耿介其  
按察浙江往巡按來臬司必撤公座相獨不撤其里  
居謂御史非守土官每行其中道丰采嶽嶽類此著  
有獅山文集奏議公移諸集

宋邦輔

宋邦輔東流人字子相號菊江嘉靖丙戌進士任行人授監察御史尋以疏斥權倖落職還家繩樞甕牖環堵蕭然而輔忘懷得失惟服勤畎畝以孝養于母妻其井臼子樂樵牧雖貧無宿穀了無戚顏歲時伏臘與田夫村老爲山歌野曲之樂貴賤之分漠如也高風峻節竦動遠邇凡士大夫造其門者必先屏紛華而後入使在聖門其原憲之流亞與

李呈祥

李呈祥貴池人字時龍自少有必爲聖人之志歲三

十九應貢上春官謝恩歸隱築尚志軒日端坐其中  
尋孔顏學脉聞王新建倡道江西往與辨析同異踰  
六月而返觀風于池者無不景仰造廬湛文簡公冢  
宰留都特飛軒過訪守令侯公緘陸公岡曾公仲魁  
陳公璨相繼具行實薦之當路擬徵聘不果巡按張  
公雲路扁其門曰名賢配汪氏同心襄德子敬之以  
宦業顯於官蘊之以溫恭譽於鄉克世其家刻有古  
源日錄知行二論行於世已祀府祠

柯喬

柯喬青陽人字遷之嘉靖己丑進士官御史陞憲副

初遊貴池李呈祥之門篤志向學及聞王明陽之教  
心體豁然隨地取人因材曲就後備兵海上與朱中  
丞統協力勦倭以忠勇獲罪晚歸田里自青陽徙入  
府城近李公尚志軒自聯其門曰依仁此爲宅逃名  
不問山尊師之意至老不倦云

徐紳

徐紳建德人號五台嘉靖辛丑進士筮仕蘭谿令與  
海忠介令所相鄰亦最相契慕旋以卓異晉北臺御  
史戊午監臨江西鄉試所簡拔極一時之選歷官至  
薊門開府未老投閒自放於山水之間一觴一咏絕

不問家人事年七十七歲刻有瞻竹堂詩稿

畢鏘

畢鏘石埭人字廷鳴嘉靖甲辰會魁初授刑部主事歷官三部尚書七十致仕八十賜夫米加太子少保九十三歲卒贈太子太保賜葬祭先三蒙存問鏘歷中外四十餘年政績炳著難以殫述其爲南京戶部尚書時江陵執政持正不阿力疏求退江陵事敗復起南工部尚書改南吏部已轉北戶部譽聞政隆年力政壯而遂引年托疾乞休知幾知止是爲難矣大都學深於老子致柔善下出處如一清心寡欲壯年

已然以故達尊兼三五福咸備非偶爾也池陽以來  
一人而已

李一元

李一元建德人號陶山登嘉靖丁未進士筮仕開州  
擢南部守金華督學天中再入太僕歷鴻臚司銀臺  
轉兵刑右堂巡撫江西歸田氣節文章皆有可述辭  
受取與毫無可疵市無一椶野無勺土性喜讀書蚤  
年著作甚富稿多散逸子姓檢其奏疏及諸作二百  
篇刊藉藏於家已祀本縣祠

施堯臣



施堯臣青陽人號華江登嘉靖庚戌進士初授蕭山知縣築城甫畢倭寇踵至民保無虞皆其力也闔邑到今尸祝之冢宰李默先罷政過蕭山極其尊禮後復起吏部經過澹如也李公以是重之特簡銓司官至京兆林下數十年九十餘歲卒

### 余毅中

余毅中銅陵人號內齋嘉靖己未進士初授武昌府推官屢決疑獄號稱神明值景藩初封闖監橫恣力抗之選入銓部薦賢起廢才名燁然因受知徐文貞而見嚙新鄭遂外轉終廣東廉使林下三十餘年詩

酒怡如也享壽八十時畢司寇施京兆皆九十詩筒  
往還人號爲三壽作朋云

### 章時鸞

章時鸞青陽人父夢金甲神授以孟子小像置膝上  
遂誕鸞生而弘毅剛正善辨論盡事理英氣勃勃不  
屈有孟夫子風後遂以孟泉自號云嘉靖癸巳隨其  
從兄廉州府推官入太學登祭酒東郭鄒先生之門  
遂受春秋於淡軒錢先生學成歸以儒士中應天鄉  
試壬戌就選得鄒縣令鄒固劇邑土荒民逃幾不可  
爲至則勤勞撫字招集流亡勸之耕織而邑爲樂土

時河淤漕阻

天子遣朱侍郎經理其事開府濟寧

朱公令沿河官集議首倡開南陽新河用其策底績  
論功朱進官大司空鸞衢州府同知司空又奏改兗  
州管理河務隆慶辛未大計舉卓異賜宴與幣九月  
擢保定知府壬申九月用給事中雒遵薦陞河南按  
察副使督築黃河南隄往來相視不避風雨舟居經  
年遂中濕兩髀痛劇乞休歸歸四載河南吳尚書復  
奏起用勉強赴命會吳公卒病亦作遂復告休歸不  
逾年而終歷官十三載妻子不入官舍惟携一僕自  
隨其由兗州之保定保定之河南也往返惟敝衣笥

二行李蕭然在官俸入多捐助公費所餘三百金置義田五十畝以贍同祖子姓雖二子食貧孺人釵釧未備不顧也又建宗祠修家規以享先維後倡化戚里絕謁公府卽古純德何以加焉其居官時善折疑獄所在有神明之稱御史奕尚岳家居寢疾微得其奴妾奸狀與婦議撲殺之妾聞告奴奴厚賄一屠夜入殺御史夫婦而密洒血于宿仇趙某之門已乃佯驚大呼集衆跡之奕無子奴妾卽訐趙大辟鸞覆鞫疑其寃密詢奴與屠厚擒屠母訊之立得盡伏辜而御史之寃雪趙氏之獄解博徒劉尚賢嗔其妻父王

儒及岳母田氏苦諫，嘲儒防秋，佯爲相省，因留宿。時田氏弟萬庫傭其家，卽與同寢。尚賢密起，石碎其首，持刃破田氏寢室門，直入田氏出後戶，潛匿，遂殺三幼女，置之門外而去。捕得官移，一時縱殺，必有黨加。訊因言與同博，魏滿良霍廷芝盜牛拒捕致然，不知實其仇也。二人者遂坐大辟。鸞覆鞫謂所殺雖多，惟一壯男子先被暗斃，餘俱幼女，何假衆乎？且構仇有跡，同盜非情，遂解脫之。關頭王大臣率衆夜徼，遇其北鄰老婦孔氏，偕夫省姻戚，回乘醉詰問，相詆且詣縣告強姦其婦。縣令素嫌大臣，卽以奸未成論，徒大

臣有怨言孔夫懼復赴上告以擒婦入室強奸已成  
論死鸞廉知釁起醉罵又大臣一妻一妾有子太學  
生豈容任其狂悖若是遂因奏訴行鞠亦解脫之鄒  
邑富民潘某爲莒州盜所誣移文逮鞠念一就逮無  
生矣旦集諸曹吏各里胥謂曰吾欲得通縣淳良若  
輩能公舉乎應曰諾遂以次問及潘卽交口譽又謂  
曰吾欲旌此一人達諸上司若輩肯相保任乎復應  
曰諾遂呼紙筆取狀衆愕然從命莫知所爲旣得狀  
卽備文申巡按御史御史遂以盜付鸞核實始召潘  
示之而潘大驚叩顙出血謝微公身首異處妻子奴

戮矣鄒民德之尤深家各肖像以祀卒之夕有夢鄒民千餘迎之赴任者精神所注享血食于茲土固無疑也

李嘉祥

李嘉祥貴池人幼讀小學便知古人可法年二十四登嘉靖庚戌進士知開州首興學以勵俗作保甲之法絕窩盜之源興利革奸築城濬池事事畢舉開人至今尸祝之擢南京戶部員外郎卒

潘大承

潘大承銅陵人嘉靖中以貢授保昌知縣性直度偉

守官廉慈卻常例千餘金凡政有益於民者不避利害不靳心力必挺然行之而後已邑人無不頌其德者後致政家居捐祿俸以贍族黨親舊鄉人義之以經史自娛訓迪諸子年逾八十手不停披遠邇咸尊仰焉

丁旦

丁旦字惟寅號海陽貴池人萬曆壬午始以明經授湖廣衡州府別駕旦不以一官自菲薄佐其守興義倉修社學諸剔敝釐奸者甚具亡何督儲之會城業勞瘁甚而又冒風雪省天臺師於黃安山中苦寒疾



抵任而卒得年六十有四貧無以殮衡人甚悲之旦  
學於洙泗濂洛以下鮮所不窺居恒手不去丹墨燕  
閒之晷動必成書其邇源模範不忘羹牆曰思師錄  
溫國旣老同氣彌敦曰恭友錄政有三要語具箴規  
曰名相行略臺省寶鑑諸論學雜著詩文藏於家者  
又數十卷嘗作逐虎文虎遁去作禱雨文雨立澍作  
驅山鬼賦鬼嘯聲遂絕氣岸絕出有不可干之勢而  
禮讓則退然不敢先見義如賁育之不可奪而處父  
師闇然如一無能解之人談玄析義霏玉洒洒而行  
事縝密一無可指議所稱鄉先正歿而可祭於社者

是也子紹軾舉進士爲翰林檢討

楊日森

楊日森貴池人號齊華萬曆辛丑科進士授桐鄉知縣甫報最卒于官百姓悲號罷市知府蔡承植誄詞有云實心實政煦沫五載瀝血喻真烈石比介厥子扶襯歸取之賻資而已

周聘

周聘字又聘青陽人別號克齋幼有至性八歲受小學論語津津有嚮往意父銑母金氏旦夕揖必恭出入必告弱冠籍邑博士諸生慨然曰古聖人垂訓豈

其華言獵世資將躬行是廸爲人子服青衿乃不能  
愉愉翼翼爲兩大人色驩惡用是佔俾爲溫清定省  
問安視膳探親志所向殫力而圖怡色而承之終身  
不替常曰行一不義非孝也言一不信非孝也受一  
不潔非孝也裋躬斤斤不邇匪彝應試於池州羣寓  
一樓盛夏袒裼適有艷婦競趨而下觀聘獨衣冠危  
坐樓上曰使知樓有人二弟旣婚食指漸繁父母命  
析箸聘讓其腴產于二弟而獨受其窪澇授經自食  
其室災鄉鄰趨救聘止之曰天實有討于不肖敢拒  
命乎望火百拜而已嘉靖末外艱辟踴哀慟水漿不

入口七日幾殆弟執飲強之少許始酸粥不如蔬日  
三奠奠必孺子慕寢苦枕塊不離喪次歲餘忽謂其  
子曰旦日遠客來預爲具已果然自是言休咎頗驗  
或問先生不解占候術何能前知曰吾心似覺如此  
無何內艱稟禮致哀一如前喪欲附葬先隴宗人難  
之聘曰匪宗人之尤惟予不肖有罪哀奠至六年宗  
人曰時可免喪矣聘曰大事未襄霄壤間一巨慙安  
忍從錦衣者後乎衰絰不去其身哀號不絕於口深  
墨之容常如袒免十年不踰閭苦敗塊剖鄉人靡不  
憫惻儀部阮公自嵩言于邑令李公尚默叅藩張公

淳亦言之李公乃表其宅捐白金八兩使諸生齊則肅往爲營葬于時宗人感其孝許葬先隴或謂當詣縣謝聘曰令自爲治邑計吾何謝族有爲諸生者代謝之李公歎曰不謝然後見周生人曰服未可闕乎聘曰爲人子而以親喪煩長吏其何能安又服二年然後釋起復至學宮博士先生曰知今歲鄉薦乎對曰舉者三其一爲新生卒如其言然繼此不復談來事矣晚酷貧二子應氏應尾漁樵以尸饗聘戒之曰山河非吾有漁鰕鯽樵荆榛足矣勿取大偶得一鯉聘怒曰過取之謂竊求其主而還之鄉飲欲賓聘聘

逃越數年博士先生使人以他事羅至邑就而強之始一出諸生色喜若景星之耀於前也優游衡門七十餘卒

廖廷皓

廖廷皓貴池人廩無宿儲日偕妻耕以膳繼母嘉靖己酉皓往于田妻治爨母採蔬于圃忽有虎入其中堂家衆逐出母自外入遇虎咬母臂而去皓自田來見母被傷急追及抱虎項且泣且訴願以身代虎不舍卽以拳撞入虎口母始得脫暈地皓手猶在虎口隨虎去十數步方脫回赴母所忍痛負母歸至床側

亦暈地猶連呼曰急爲我救母頃之少甦見母傷腫甚乃口吮其毒數日母腫漸消而皓之頭目腫甚數月始愈又數年母卒皓始喪葬稱家爲禮皓年六十餘而終

補遺

柯暹

柯暹建德人永樂乙酉舉人預脩大典擢戶科給事中疏時政闕失忤觸權要出爲州守未赴遽下詔獄二年屢絕飲食天幸不死遇恩調吉水令發奸摘伏如神九載陞雲南按察使有東崗集藏于家

張輝

張輝石埭人弘治三年進士歷官福建僉憲以介直忤逆瑾勒令致仕瑾敗當道交薦列于六君子之首以年及懸車辭不赴召

王應乾

王應乾號懷惺東流縣人登隆慶辛未進士授中書舍人選江西道御史以抗江陵相外轉敷歷藩臬揭旌于齊楚汴越之墟後擢楚藩左轄官凡九遷咸有異政奉母至孝讀禮三年杜門掃迹郡邑之長無由一面歲屬大祲隣族賴之舉火者半以病予告行李



肅然親識問其狀笑曰官久祿厚兒孫亦邀厚幸第今日此身已無所寄而遽卹其他吾以成就吾是而已

方新

方新字德新青陽縣人嘉靖三十五年進士由行人選江西道御史巡茶陝西建言爲民隆慶元年復職巡視京營二年巡按廣西陞湖廣僉事叅議致仕

人物考卷之四十目錄

南直隸太平府

陶安

王愷

李習

潘廷堅

附子黼

劉允

詹俊

周原

嚴升

梁觀

謝孚

李衡

徐觀

吳琛

楊壁

謝騫

黃讓

萬宣

端宏

鍾城

濮詔

李蕙

後敏

汪宗器

李贊

李貢

邢珣

端廷赦

邢埴

胡燿

邢址

夏廷美

目錄終

本朝京省人物考卷之四十

南直隸太平府

陶安

陶安字主敬當塗縣人幼穎敏有大志通判馬昂夫令賦喜雨詩立就奇之肆力問學博極羣書得程氏讀書日程及呂舍人學規益究心濂洛沉潛道藝元至正甲申舉浙江鄉薦爲明道書院山長再調高節書院講明朱陸之學乙未夏六月朔高皇帝渡江至太平安偕耆儒李習率父老迎謁驚相謂曰龍鳳質非常人也我輩今有主矣上召見與語安因

說曰四海鼎沸豪傑並爭悉多攻城屠邑志在子女  
玉帛爾非有撥亂救民安天下之心明公率衆渡江  
神武不殺人心悅服應天順人以行吊伐天下不足  
平也 上曰爾言甚善吾欲取金陵何如安曰金陵  
古帝王都龍蟠虎踞長江天塹取而有之撫形勝以  
臨四方所向無敵何憂不克此天所以資明公也  
上甚悅從克建康授興國翼元帥府令史丙申秋七  
月諸將奉 上爲吳國公以元御史臺爲府置江南  
行中書省 上兼總省事以安爲員外郎留叅幕府  
會丁母夫人憂戊戌服闋授行省都事掌中書兵房

尋陞左司郎中贊畫之功良多巳亥 上得劉基宋  
濂章溢葉琛四人因問四人者何如安對曰臣謀畧  
不及劉基學問不及宋濂治民之才不如章溢葉琛  
上多其善讓癸卯黃州平 上思得重臣以鎮之曰  
無逾安者遂命知黃州至則寬賦稅省徭役民悅服  
之改桐城令尋移知饒州時方征伐急軍需安勸諭  
其民民皆樂輸而用不乏適閩寇至攻城安諭父老  
率子弟固守以俟援兵寇平諸將以鄉民多從賊欲  
屠之安曰民爲所脇耳柰何殺之由是民皆得全四  
境以寧 上嘉其功御製詩以示褒美遣使往勞明

年入朝 命復守饒州民懷其德建生祠祀之吳元  
年初置翰林院首召安爲學士凡國家制度禮文之  
事多所定擬御製門帖賜之曰國朝謀畧無雙士翰  
苑文章第一家十二月命李善長等定律令以安爲  
議律官戊申 上卽皇帝位建元洪武 上御東閣  
安與中丞章溢等待因論前代興亡事安謂喪亂之  
源由於驕佚 上曰居高位者易驕處佚樂者易侈  
驕則善言不入而過不聞侈則善道不立而行不顧  
如此者未有不亡卿此論深有契於予心 上與儒  
臣論學術安對曰道之不明邪說害之也 上曰邪

說之害道猶美味之悅口美色之眩目鮮不爲所惑  
自非大豪傑之士不能決去邪說不去則正道不興  
天下烏得而治安曰 陛下所言深探其本 上曰  
仁義治天下之本也賈生論秦之亡不行仁義之過  
夫秦襲戰國之餘弊又安得知此二月壬寅朔中書  
省臣李善長傳璫洎安等進郊社宗廟議其園丘之  
議分祭天地於南北郊冬至則祀天於圜丘以大明  
夜明星辰太歲從祀其方丘之議夏至日祀方丘以  
五嶽五鎮四海四瀆從祀其宗廟之議四代各爲一  
廟皆南向以四時孟月及歲除凡五享孟春特祭於



太廟孟夏孟秋孟冬歲除則合祭於高祖廟其社稷之議祀以春秋二仲月上戊日皆從之又上命議社稷壇創屋以備風雨安奏考諸禮天子大社必受風雨霜露以達天地之氣則不屋亡國之社則屋之不受天陽也今於壇創屋非宜若祭而遇雨則於齋宮望祭上是之又奏古者天子五冕定制祭天地宗廟則服衮冕社稷等則服通天冠絳紗袍時有御史言安隱微之過者上曰朕素知安安豈有此且爾何從知之對曰聞之道路上曰御史但取道路之言毀譽人以此爲盡職乎命黜之中書省臣進

曰御史職當言路言之有失乞容之 上曰不然夫  
植佳木者必去蟬蠹長良苗者必芟稂莠任正人者  
必絕邪壬凡邪人之事君必結以小信而後逞其大  
詐此人嘗有所言朕不疑而聽之故今日乃爲此妄  
言夫去小人當如撲火及其未盛而撲之則易爲力  
不然則害滋大矣竟黜之本年四月遷江西行省叅  
政汪廣洋於山東以安代之安辭曰臣恐付託不效  
有孤渥恩 上曰躬擐甲冑決勝負於兩陣間此武  
夫之事儒生非所能若承流宣化綏輯一方此儒者  
之事非武夫所能也卿才宜是任吾豈私一人弗愛

一方乎江西諸郡縣初下安鎮定有法軍民帖然其  
年安有疾卽劇猶草時務十事上之九月戊戌卒於  
官 上聞之哀悼親爲文遣使祭之時年五十九追  
封爲姑熟郡公

王 愷

王愷字用和當塗人幼有大志沉酣六經諸史爲府  
史疏讞獄訟人服其平歲乙未 上取江南兵臨當  
塗召愷至幕府叅決戎事丙申春從王師下建業又  
下京口京口民新附机杼不安愷奉 命慰撫之始  
定 上爲中書平章政事建江南行中書省於建業

陞左右司都事愷日以薦賢爲先元戎宿將咸器倚之唯言是信戊戌秋猫獠兵數萬自杭來降待命嚴陵境上上遣愷馳入其軍諭以禍福偕其渠帥來朝是年冬上將征浙東時蘭溪已下上命愷與胡大海定議取婺愷帥師圍其城守將出降審察民情而綏奠之己亥春王師攻越久不下夏六月師還留大海鎮婺而徭賦軍器之務咸以屬愷冬王師克三衢擢爲左司郎中總制衢州軍民事愷增城浚濠置遊擊軍募保甲翼餘丁及舊民兵得六百人以益戍守兵食不足則斥並城廢田五十餘畝使之耕以

自給民有田力弗能藝者聽軍士貸耕而爲輸糧縣  
官籍江山常山龍游西安四縣丁壯凡六丁之中簡  
一以爲兵置甲首部長統之得兵一萬有奇無事則  
爲農脫有警則兵者出攻戰而五丁者資其食開平  
忠武王屯兵金華其郡將或來侵民愷械而撻諸市  
王使人讓之對曰民者國之本將軍天子股肱肯令  
傷其本乎撻一部將而民安計將軍所樂聞也王歎  
美之開化馬宣挾舊邑印章誘編氓爲變江山楊時  
恃砦柵之險叛服靡常皆定計擒之梟首以徇衆部  
內帖帖無譁民饑疫相仍死者枕藉道路乃出倉粟

使作糜粥餉餓夫修惠濟局居藥以注病者所活不可勝數學校廢于兵爲浚泮池築杏壇建極高明亭設博士弟子員孔子家廟之在衛者亦爲新之退食之暇輒集薦紳之徒摩切道藝人士翕然悅服諸暨戍將謝再興與部帥王甲有違言幾致亂上令愷調解之愷曲爲調停二人驩好如初邊鄙以寧庚子夏六月僞漢寇龍江上召嚴陵帥葛俊擣廣信以牽其師道過衢愷謂俊曰廣信僞漢門戶彼旣傾國入寇寧不以重兵爲守非大將統全軍以往不可若出偏師撓之未見其利設有挫衄吾衢先驛騷矣乃

止俊而請胡公行胡公至而廣信潰一如愷言辛丑  
夏拜胡公江南行中書省參知政事分省于婺以控  
制東浙愷仍以左司郎中分治省事金華婺劇邑役  
民無藝乃令民自實田數都以糧多者爲正里長寡  
者爲副正則以一家或二家充副則合四三至七八  
而止通驗其糧而均賦之有一斗者役一日賤與貴  
皆無苟免者金華周泰義烏柳昌恃俠以蠹民逮至  
于獄皆痛懲之自是畏避不敢吐氣猾胥潘立道操  
金華一邑田賦之柄飛寄詭遁並緣爲奸利廉其罪  
狀以聞寘于法胡公日治軍旅以畧嶧縣禦諸暨爲

已任分省之政皆愷充之挈綱布紀風采凜然先是  
猫獠軍來降胡公分其衆萬餘戍婺州軍衆等相挺  
爲亂胡公被害愷亦及于難當難作時猫師多其恩  
德欲擁之而西愷正色叱曰吾天子大吏設不幸義  
當死寧能從賊反耶賊初縮首不敢犯拘繫一日而  
罵賊愈厲命左右取酒引滿竟日達夜旁若無人賊  
知不可屈遂刃之享年四十有六 上駐蹕江西聞  
其死嗟悼良久親爲文祭之及返柩金陵 上復率  
羣臣往城南致奠賜塋江寧縣聚寶山之原愷狀貌  
龐偉氣局堅凝善謀而能斷嘗以事入諫 上弗聽



愷却立戶外旣暮猶不去上出怪問其故從容陳  
諫如初上慨然從之愷于吏事尤長據律按比而  
飾之以儒術案牘經其裁削辭簡而意周喜爲詩歌  
於賓客談笑樽俎間更倡迭和情意豁如也故於其  
歿也人莫不傷之

### 李習

李習字伯羽當塗人習自幼老成莊重積學有年因  
以旁通諸經摭攬閎博從游者日衆延祐初遊京師  
館元明善尚書家述作甚多明善禮爲上客四年領  
京師鄉薦試題渾天儀賦一時士人不能措筆習能

記其詳悉鋪敘爛然明年下第授書院山長七年弟  
翼中浙江鄉試河內薛超吾時出守太平名其所居  
之坊曰雙桂以美之間僑居廣陵與張仲舉高季淵  
李五峰旦暮往來稽經誼史之暇相與倡和歲乙未  
天兵克采石習同陶安奉迎駐蹕太平遂擢爲本府  
知府廉能公謹精于治體均平徭役民受其惠吏不  
敢欺以疾卒于官年八十餘習有鄉曲之譽別號雲  
觀與翼齊名江左目之爲二李吳萊謂伯羽之文簡  
密嚴與一辭弗苟仲羽之文豐腴縟麗五采爛然又  
謂伯羽之尊嚴如雪峰千仞嶄然特峙人莫敢褻仲

羽之溫粹如藍田美璞光輝外著天下共寶其學行爲時彥所賞如此及門授業者百餘人若篤誠陶安其尤著者也有橄欖集行於世

潘廷堅

子黼附

潘廷堅字叔聞當塗人先世多業儒有名江左至廷堅天資穎拔學問淵博用薦爲富陽縣學教諭乙未奉迎車駕駐蹕太平遂擢爲本府儒學教授明年取金陵改爲中書博士庚子除金華同知壬寅召入拜翰林學士階嘉議大夫以年老致仕廷堅爲人慎密謙恭未嘗有過爲一時所重詩文亦有可觀子黼字

章甫幼穎悟絕人總角時廷堅與談鄉邦縉紳文獻  
模楷典則輒能強識博記故於鄉曲前輩多所敬慕  
比長師事陶安而託交於李淮兄弟初授太平府學  
教授改金壇縣主簿未幾擢爲起居注丙午除中書  
左司都事丁未拜嘉議大夫江西湖東道按察使年  
尚未及四十會修大明令爲議律官洪武元年律成  
尋卒黼爲人肖父而文章清雅過之一時所作序碑  
傳贊皆散失不留惟相承所執象笏至今尚存焉

劉允

劉允字子允當塗丹湖人洪武四年以進士及第授

懷慶通判三年以直見忤謫瑞安縣丞在官興學勸  
農均徭理訟克當人心超拜北平按察司副使考績  
留教授親王于內後請老卒于家允不獨政事之才  
綽有餘地尤侃侃善持論每召對多稱旨博學喜吟  
咏實而不俚蓋似其爲人也

詹俊

詹俊字用章當塗人洪武四年被徵授河南磁州同  
知賜冠服銀帶到官書公勤廉謹撫字安懷八字揭  
坐隅以自勵時兵革初定民復舊業俊勞來安輯之  
督耕桑興學校明飭教令舉賢薦能扶剔弊蠹民有

所掘地得藏金爲衆所奪者俊立衆于庭諭以義利  
衆悉還所奪民懷金謝之俊曰我不欲衆昧義而趨  
利乃躬自營利邪民愧而去嘗董民餽饟潼關天寒  
道中車牛多斃饑虧則解所服銀帶易粟代民輸民  
歸製帶償之俊曰吾得紓民憂何愛一帶不受隣縣  
歲蝗自爲文呼天哀告蝗遂出境嘗旱作歌以自責  
大雨卽至三年陞汝寧府通判嘗治廨舍役夫得窖  
錢以內俊俊曰此汝所得何與吾事悉畀之洪武九  
年以疾告歸磁州之民老壯遮道登舟挽留涕泣不  
忍別道經新蔡卒遂塋龍潭之側年四十四

周原

周原字彥廣繁昌縣人洪武乙丑進士授辰州府推官調吉安時闕守貳原獨署郡事以廉平爲治政務修舉獄訟疏決無壅滯民有負寃積歲未白者訊得其情立釋之不旬日囹圄爲空後坐累免復用薦起爲山東蒲臺知縣有商被盜疑其主人者已誣服原覺爲寃故緩其獄後果得真盜人服其明飛蝗入境原禱于神一旦大風雨蝗盡死歲以大稔改紹興新昌知縣治如蒲臺歲滿陞河南磁州同知永樂二十年卒於官

嚴升

嚴升字仲升當塗人允諧之子自幼天資絕人學業日進洪武三十一年由儒士領鄉薦明年登進士授四川睢州青神縣知縣公勤有守百姓愛之吏部知其學博因來京考滿凡七試經義論策序記碑銘詩賦皆立就文采爛然陞江西按察僉事以事謫四川順慶府同知賦役廉平民無橫擾以廉幹著稱人甚德之未幾轉吏部考功司郎中拜都察院副都御史振肅風紀爲神羊賦以見志尋召至京師授以禮部尚書命下已卒于留臺子威員外郎



梁觀

梁觀字大用當塗人觀爲人廉公方正勤學善大書  
與李衡交衡有妻妾欲遠行恐盜伺之乃要觀止其  
書舍一夕燃燈讀書達旦洪武三十五年由府庠生  
貢入監除吏科給事中陞四川僉事調廣東分巡潮  
州幾一載廉介剛果決獄如神會天久旱觀齋沐禱  
神雨下如注沒于官潮人哀思不置塑像于韓山書  
院以祀之後有祈輒應同庠謝孚爲監察御史時領  
兵平百家畬于潮夜宿行臺每夕戶鏐無風自擊孚  
恬然不之疑一日晨興守門隸卒不來請鑰孚怪問

之守者曰昨夜明公衣內衣往來中道提鑰將門盡  
開若有沉思者時月色濛濛某等于窗隙見之第無  
命不敢出耳孚知其爲觀之神也至夕鏑擊如故孚  
乃默祝曰某奉命來靖一方以大用平日之志當加  
陰相何作此態以相恐又默戲之曰大用博我奠耳  
聲遂息明日具牲醴卽書院以祭其後凡有捷前夕  
必夢與之歡笑如生精爽蓋如此

謝孚

謝孚字以誠號易軒先自京陵占籍當塗孚自少穎  
悟秀拔勤于讀書治易朝夕玩索自有所得因以名

軒永樂三年領鄉薦明年登進士第賜勅諭之歸故鄉以成德業五年徵回除陝西道御史潮州百家畬恃險奔突搔擾屬邑 文皇帝命孚與都指揮趙德勦捕孚乘傳至潮先行招諭復營近地官軍勦捕一方用寧時有事北方糧餉旁午以孚署行在都察院督運口北事完扈從回京陞見陞福建按察副使丁內艱起復調陝西副使所在有明允聲中貴蒙附石有事於邊道經咸陽三司設宴接款時孚掌司事獨不跪蒙怒甚孚言朝廷重方岳欲其表式下僚也不得行其志則已豈可自屈於人乎竟不成席而罷正

統三年九載考績力求致仕歸卒於家年六十三以子騫貴贈中議大夫贊治尹長子宣宣子壁舉人騫叅政其子理進士

李衡

李衡字秉鈞當塗人自少天性和柔然慷慨有立志登進士第選授翰林庶吉士讀書內秘學問益深除戶部四川司員外郎以廉介勤慎爲尚書夏原吉所任尋陞湖廣布政司叅政撫和邊夷翕然歸化原吉薦爲侍郎方薦時衡爲人所奏徵詣都察院衡赴獄七日原吉奏而出之尋拜兵部右侍郎卒于官衡爲

人老成端重而有剏繁治劇之才學問疎暢古詩和平  
辨麗有澹軒詩集藏于家

徐觀

徐觀字大賓其先世有自滁州來爲姑孰守者因家  
焉遂爲當塗人觀年踰志學從師受易克自刮磨以  
底學成宣德領鄉薦年方十九乙未會試中副榜授  
山東齊河縣學訓導以內艱去任服闋調江西武寧  
縣學訓導人才多所造就秩滿奏成使翰林院校其  
績學皆優超陞刑科給事中駁覆奏章糾劾姦惡無  
所顧避嘗奉命檢封番舶巡視邊陲所在有聲正統

初刑部尚書魏源薦觀擢雲南按察司僉事至則辨  
冤獄別廉貪一以平恕施之上下悅服卓有古憲臣  
風時麓川小夷負固拒命詔興師討之觀佐元戎深  
入賊境督糧餉規籌策賊寇以平陞本司副使餘孽  
煽惑乃於要害處築城堡濬溝池以備不虞且爲墾  
荒田俾軍耕守復招還夷落被賊擄掠者數百人爲  
嚮道又畫通南牙山道路以進討由是邊患永息會  
按察司缺使守臣奏觀補之觀進表卒于金陵之新  
河享年五十有六子誌同知鄉舉

吳琛

吳琛字輿璧繁昌縣人正統甲子登鄉榜乙丑戊辰  
兩試禮闈不利益勵於學一夕方讀書嘔血數升母  
蔣氏驚往視之戒勿復學曰脫以是戕生學亦奚爲  
而琛竟不少輟但掩覆無使母知居數年學大有進  
景泰辛未登進士第援例還家畢姻先已久聘章氏  
蓋不第不娶至是始娶年二十七矣癸酉秋拜雲南  
道監察御史奉 勅往甘州犒軍乙亥巡按四川所  
至黜奸貪雪冤滯明達果斷蜀人懷之天順丁丑  
英廟復位石亨以功封忠國公專權自恣漸蓄無將  
之心琛與同官劾奏之忤旨出知遷安縣五日天變

雨雹命還臺職尋選居臺端掌文案故事凡三司會  
讞獄囚十三道文移行牒必擇老成諳練御史二人  
綜理之蓋以裨總憲之不及而爲諸道之領袖時琛  
與同年高明對筦五年臺中稱賢辛巳陞大理寺丞  
歲餘陞都察院右僉都御史巡撫甘肅西陲莊浪去  
城四百里有地深入狄境前檢田者占數屯糧五千  
七百斛迫於徵輸軍多竄匿琛首疏罪之西番扒沙  
巴哇等七族累歲盜邊撫之不服協同平羌將軍宣  
城伯衛穎征勦之斬獲千三百級馬駝牛羊甲仗輜  
重無算賊平陞俸二級成化改元還朝蒞臺事時淮



揚薦饑尋命賑恤琛勞心焦思凡事有益於救荒者率以便宜行之而言多切直大忤權貴雖民賴以濟而琛之謗滋矣嗾言官劾奏必置琛於法賴天子聖明第遷官南臺時代者都御史林聰於琛所行事一無更張且謂琛實有益於民無負於國於是其誣遂釋而聲稱益重來南未幾兩遭親喪哀毀踰禮朝廷凡兩遣官諭祭已丑服將終遣使齋勅卽其家授之命巡撫兩廣纔半歲代回南臺未至復遣使以勅授琛巡撫湖廣時已數月不雨民嗷嗷望哺琛禱祈不數日雨露足自是拊循郡邑問民疾苦窮荒僻陋

之區無所不至凡在湖廣者五年威行惠施殊俗輯和會寧夏花馬池虜寇入境進琛右副都御史總督兩廣琛去之日郡邑父老扶携攀送齋咨涕洟琛亦悲不自已當時士大夫言巡撫大臣能深得軍民之心如琛者前此蓋未見也琛至廣其撫民無異湖湘而於訓兵練士尤加之意蓋嶺南寇盜雜處其爲患尤非他方比也英德流民羅英郭瓊輩聚衆剽掠命兵擒之新會新興連界有劇賊嘯聚流劫村落餘十年琛一旦馘其渠魁殲其黨與六百餘人徭僮聞之大駭相戒歛迹柳慶諸州其巢穴也琛親至其地檄

召之許以自新詣軍門俯伏聽命者日以數萬琛曉以禍福無不踴躍而去時識者又謂廣寇冥頑可以威懾而不可以理喻而革心向化如琛者亦前此未見也成化乙未八月卒於官壽五十有一琛爲人勤敏自童齡至沒齒無日不雞鳴而起二鼓而寢雖閫外事叢酬應絕無壅滯少有餘閒博觀羣書以資聞識上自公卿大夫下自閭里後生書教往復靡不手答動輒盈幅初若不經意者而文理通貫情意平洽雖屬草有所不及身居顯位自處謙抑待人無貴賤必以禮處故舊無相忘有所饋遺纔及金帛輒辭不

受其平生所得俸祿又日費於賓友故人子姓衣食或不給身沒之後資業蕭然視先公所遺不長尺寸人皆服其操云

楊璧

楊璧當塗人正統戊辰進士擢拜監察御史卓有風裁權奸歛避嘗以疏詞峻激忤旨外補忽風雹霆雷殿瓦皆振卽刺下詔凡以言謫者悉補原官璧改給事中久之陞陝西叅議剛直之氣卓乎不撓復與當道抵牾改平涼守鑿延安河以溉田七千餘頃興革釐正允協人心未幾致仕歸杜迹不入公府貴顯過

訪必以疾辭焉

謝 騫

謝騫字鵬舉孚之子器宇軒豁自幼儆敏刺志問學衆以大器期之正統戊午補郡庠生尋領鄉薦登進士第拜河南道監察御史侃侃立朝務持大體督察鹽課於浙江風紀大振無敢私販者有冢宰子弟怙勢犯之悉置於法併劾罷其官時處州盜起奉朝命躬入賊巢諭散其黨與擒其酋帥以獻一方遂寧有文綺寶鏹之賜尋陞漳州知府至則以興學禮賢擊強暴束吏胥爲務復嚴立保伍法責保守月報所轄

生業及出以其事歸以某時苟通番爲邏者所獲卽  
保守併四隣坐罪郡乃無事考績爲八郡最屬邑軍  
民恐遷去預赴部使者乞留之至五千八百餘人丁  
內艱轉保定知府嚴明果決吏畏民懷作興庠校士  
風聿振陞山東布政司右叅政益感激奮勵誓竭忠  
貞凡疑獄艱務悉讞斷釐正無不當人意者誥進中  
憲大夫以疾力乞致仕歸恒持禮法自重非公事不  
至官府日惟借親朋陶情于山水之間暇則携子孫  
栽花種竹以增園林之勝而已弘治壬子以疾終于  
正寢壽七十有七子五人皆克世其家

黃讓

黃讓字用遜別號養素蕪湖人正統丁卯舉於鄉景泰甲戌登進士授浙江道監察御史恪守其法不畏權貴因天變與御史倪敬輩陳十事大意謂御史鍾同張綸忠赤盡言不當繫獄大內營造不息財力俱竭修理龍舟死于其事者甚多齋僧布施事出不經請俱停止其餘六事亦皆觸忌諱者未幾與前進言七人俱以浮薄當謫遠地讓得四川營山縣典史至則輟然笑曰此豈不可以行志邪當道重其才檄委決各郡縣奏訟意義所向人心犁然以定轉安岳知

均徭役平獄訟興學校寬逋負基年政成陞中府  
都事雅有風采錦衣門達用事役隸皆席勢橫甚讓  
撈掠其黠悍者笞之達怒甚搆其所役聽事人爲昧  
遣戍廣西值霈恩復冠帶家居囊空無一錢惟督耕  
以供歲事卒于家壽七十有九

萬宣

萬宣字邦達當塗人刺志問學爲科舉文字滂沛明  
白正統間以詩經領薦屢會試不第卒業太學謁選  
吏部考居第一授河南陳州知州宣存心忠厚而廉  
以自持與人交款曲有情至蒞政剛果有爲嚴于約



束吏胥無敢鴟張羅織病民者河南多寇宣廉得之  
咸置于法四境宴然立四義社學延師以教民間子  
弟州民德之部使者上其績錫誥旌異進階奉直大  
夫九載秩滿待選京邸酒後痰作而卒

端 宏

端宏字仲仁號垣齋當塗人景泰癸酉領鄉薦登丁  
丑進士授監察御史巡視通州東昌等處德威兼濟  
所至盜息民安歷巡按雲南河南廣西咸有風裁谿  
洞蠻僚寇邊時征討官軍僅撫定其酋首而其下猶  
有肆剽剗以厲民者總帥輒以地方寧靖 上聞宏

効其妄復下令選將練兵豐餉設險以爲攻守久遠  
之計由是諸孽望風而附陞陝西按察副使歸省涉  
江中流颶風大作幾覆舟人皆錯愕宏泰然曰吾生  
平未嘗行一不義今反已何愧俄而風果息丁內外  
艱改官兩浙陞山東按察使浙江左布政使浙人聞  
其還鼓舞歡動宏乃益篤忠貞虔修職業民益戴之  
丁未謝事歸里卒於家

### 鍾城

鍾城當塗人少穎敏苦志積學登景泰進士歷官大  
理寺正著聲明允門舍蕭然一寒士也擢福建僉事

江西副使兩督學政士經品題者多爲令器晚歸鄉里門下執經問難者踵接卒年八十餘

濮 詔

濮詔當塗人未冠卽以文名領解南京天順登進士授翰林院編修奔父喪歸以病卒母鄒氏通經善詩亦多內訓焉

李 蕙

李蕙字德馨當塗采石人別號浣菴幼自穎敏天順壬午領鄉薦己丑登進士第明年拜刑科給事中九載秩滿陞江西布政司右叅議弘治初轉左叅政陞

山西右布政使尋陞都察院右副都御史總督糧儲  
于南京明年進左副都御史丁巳復以年勞進右都  
御史總漕巡撫如故明年乞歸燎黃以巳未二月二  
十五日疽發卒于家蕙居家孝友爲人方嚴明快才  
力優贍所至有惠政而吏畏如神南贛盜衆欲加兵  
蕙力主撫諭多方控制未幾渠魁就擒餘黨悉平南  
昌城大水驟至官廩旋運水旋及衆環視莫救蕙亟  
命預放軍士月給遂紛紜蟻集不終日廩空下車江  
西甫三日幸閣王敬者適至公當輔行敬怙寵南畿  
兩浙之民大苦其恣橫蕙推誠以待之敬亦感服江

西境內獨得不擾陞內臺任國計歲有大建白漕規  
振肅大與曩殊定遠妖賊作勢甚熾亟往督捕多寬  
釋以渙其羣妖首遠遁境內遂寧蕙平日居官立心  
但知有國計民生銳欲建功不稍沮抑故其精神果  
於有爲而漕遇亦適逢其盛云江西列郡俱旱其所  
守湖東獨有秋同官數以盜發守地被黜獨其所守  
盜卽遠避運河北歲苦水涸自受任後水恒通閘流  
溢進表濟淮有二赤鯉入舟之異遷官適有白氣縈  
山如帶之祥總儲命下五色綵雲忽自天而墜光溢  
省庭一時名豪謂非天之所睠顧者哉卒塋馬鞍山

之原

後敏

後敏當塗人登進士第授行人出使有勞績過衛輝謁比干墓弔之以詩寄其忠憤遷工部員外郎陞陝西布政司叅議敏質幹魁偉聲如洪鍾爲人忠厚坦夷政事之才綽有餘裕竟爲他人所陷被徵倉卒死于途後事得辯明而敏已卒衆皆哀之仍厚恤其家父均寶以人才受薦官至知州

汪宗器

汪宗器字鼎夫直隸繁昌縣人成化甲辰進士授監

察御史巡按湖廣廣東薦賢斥貪得激揚體陞南京  
大理寺丞進少卿蒞獄平恕時劉瑾撓法動掣多肘  
遂決計以母老乞終養疏五上允之特進光祿卿致  
仕未幾卒宗器襟宇闊爽善譚論雜以滑稽纒纒可  
聽與人交有情誼縉紳多愛敬之兄宗禮亦以成化  
進士拜御史風裁整峻卓有能聲

### 李贊

李贊字惟誠蕪湖人別號平軒永之仲子穎脫儕輩  
與弟貢並有聲成化庚子鄉試甲辰進士兄弟齊名  
人以爲美談授吏部文選主事轉考功員外郎精敏

端慎受知冢宰丁內艱改兵部武選員外郎進車駕  
郎中順天民地多併入勢家而牧馬獨計丁口民坐  
是困大司馬馬端肅公薦理之勾稽有法盡復民業  
中間補截調停曲中機宜民至今賴之尋改武選擢  
陝西左叅政遷浙江布政使尋轉左時逆瑾專橫籍  
故錢都御史家憐其非辜語輒泣下所以調護之者  
無遺力瑾聞而銜之會吏部擬遷太僕卿瑾勒令致  
仕杭之老稚遮道泣留贊性寬簡與人處洞見肺肝  
爲政平易未嘗有赫赫之名去則有遺愛焉詩文清  
逸疎鬯類其爲人草書遒勁人愛重之卒于家年六



十

李貢

李貢字惟正蕪湖人生而穎異兒時隨父宦諸暨儒  
庠與兄布政使贊淬礪學業有時譽成化庚子甲辰  
兄弟同登鄉會榜時人榮之初官戶部主事督餉清  
江口葺倉之壞垣固而不費尋陞員外郎丁母憂服  
闋改刑部累陞郎中讞獄明慎爲侍郎盱眙陳公道  
所器重時孝宗銳意圖治命京堂官各舉其屬堪  
任方面者陳公以貢應詔陞山東按察副使清理戎  
籍檢覈屯田皆有法及巡遼陽哀蘭英之死節表張

天祥之忠義樹碑墓道以勵風俗正德改元陞福建按察使踰年陞陝西右布政使摘奸息訟所至有聲踰年轉山西左布政使以郡邑靡費無經立民膏簿俾主者紀之以備稽核四年陞都察院右副都御史巡撫遼陽錦義二城以逆瑾併奪屯地將謀爲亂貢往撫之邊境乃安虜酋久爲患諭以威德令之入貢有白金牙衣之賜時逆瑾用事其黨怙勢恣橫貢與之忤因以致仕比瑾敗詔復起巡撫順天時霸州賊起郡邑震動奏設兵備憲臣繕城賑饑以安人心霸侍以無患賊黨有陰事關節者每兵出輒相傳報功

不可成廉得其魁戒京師寘之於法賊計沮乃敗通  
州舊城卑隘時有水厄貢念國儲所在奏增修之費  
甚而民不知擾古北口當賊衝輒不可守度隙地系  
垣百餘丈邊患以息凡巡歷所及輒完城堡卹士卒  
節財費拓地利黜貪暴鋤強梗故旣去而民多思之  
三年考績請老不允癸酉陞兵部右侍郎請益切致  
仕歸杜門以詩文自娛雖達官貴人造訪未嘗詣門  
謁謝卒年六十一性孝友家居不易言笑服御質素  
訓子弟嚴而有禮爲文章平實典則如其爲人而詩  
尤有逸致人多傳誦之所著舫齋集若干卷藏于家

邢珣

邢珣字子用其先自河間徙當塗湖陽家焉珣生而  
穎異隆準方頤刻志勵學爲諸生時文譽歛起以弘  
治壬子領鄉薦明年遂成進士授南京戶部主事丁  
父憂服除改南京刑部員外尋轉郎中珣治獄敏決  
而持之以矜恕執法不徇律比允當張簡肅公總憲  
臺慎許可獨稱珣曰經濟之才也已丁母憂歸服除  
改南京戶部時忤逆瑾褫職爲民瑾伏誅起除南京  
工部會歲歛盜熾有司輸辦不至宮寢營建方殷而  
中貴人織造襴衣樂器費數萬趣辦甚嚴珣多方劑

黃曉譬中貴人消其毒螫得不擾而事亦以集往豪  
右占田隱稅不納料價出納官吏坐蝕廉其宿弊一  
切清飭之有挾豪侮法欲以羅織誣奏者曰吾以直  
道向忤巨璫見斥今豈畏鼠輩乎堅不能撼甲戌出  
知贛州府下車按黜吏僞燭隱擿奸治稱神明壤接  
閩廣嶺嶠險絕劇盜滿總等肆掠邑間騷驛靡寧珣  
至直抵其峒穴推誠諭撫之滿率衆降授以廬舍給  
牛種俾居而耕植豐其犒賜竟樂爲用他盜起反籍  
以禦盜山民賊不時入或集衆拒吏珣曰吏遇之未  
善耳令耆老往諭之應命而至歲無逋租於是修古

鄉社約大新學宮復鬱孤臺飭周元公趙清獻之祠  
文教聿興焉正德丁丑南安龍川羣盜雲擾據橫水  
桶崗左溪諸峒都御史王公守仁約湖廣會征議先  
桶崗珣進曰桶崗諸巢爲賊之咽喉而橫水左溪實  
據心腹今湖廣兵期尚遠賊見我兵未集尚不爲備  
不若出其不意進兵速擊已破橫水左溪移兵而臨  
桶崗茂不濟矣王公曰知府議是珣身爲前鋒大兵  
繼其後賊不虞官兵奄至亟據險禦敵而伏兵合圍  
勦之遂乘勝進兵桶崗珣又曰桶崗險峻攻之猝不  
可拔不若頓兵近地伺其懈擊之先使人說賊使降

賊正猶豫間會大雨卽冒雨進兵賊大潰擣其巢穴  
徭寇悉平龍南安遠二縣有通賊爲窟穴者悉捕誅  
之事聞陞俸二級賜以鎡金文綺己卯逆濠遣使齎  
重貲誘滿總等兵助逆滿執使者戮之將其貲幣詣  
府珣曰吾正練兵集糗以待之爾輩云何皆頓首願  
自効時都御史王公守仁起義吉安珣卽日部兵來  
會次樟樹鎮時徵諸郡兵尚未至珣曰賊雖出城虞  
我師掩其後逗留不前今須馳據南昌否則賊兵還  
復入城猝難攻矣乃卽拔兵三日夜抵南昌諸兵入  
城縱殺珣立白王公出令禁之軍乃定濠至安慶聞

城破復屯黃石渡拒我師時吉安知府伍文定將兵  
爲前哨始交鋒吉兵失利珣倉皇馳援親執旗麾兵  
進刺其渠帥追斬數十人賊勢稍却諸兵對江而陣  
時南風迅疾珣遙望賊在下流舟相尾曰是不可用  
赤壁策乎卽絙葦灌油挈小舟薄之炬舉風迫烟焰  
蔽天賊亂溺死相枕藉濠遂成擒事聞詔陞江西右  
叅政撫其地時城新破民物瘡痍又澤水爲灾二三  
巨璫屯兵久駐貪暴加慘多方撫循勞勩爲甚世  
廟馭極首議賞格會有嫉王公守仁功者嫉言官論  
沮削其世券歲祿而一時勤王諸臣斥廢殆盡珣亦



屢疏乞休詔陞左布政使致仕嘉靖己酉郡人立報  
功祠於學宮之左專祀王公守仁而以珣一人配享  
謂當吉兵將北珣麾義勇陷陣遂斬賊帥以褫逆魄  
厥績尤偉焉珣歸口不言功有問者亦不答杜門玩  
經史自樂修家乘置義田以贍族人之貧先墓久湮  
者各表石識之生平性剛介寡合然遇人以誠人反  
樂與之親附焉爲文典實精確所著采芹餘興北行  
紀事秋臺小紀憂居歸間二錄江藩隨筆歸田野語  
藏于家年七十有一卒子埴址奉塋于趙村保樞方  
至塋有羣鶴數十自東南來翔舞于上良久始去會

莖者數千人咸驚異之

端廷赦

端廷赦字世恩號虹川當塗人正德丙子領鄉薦庚辰南宮中式武廟南巡弗及廷試明年辛巳世宗登極始廷對賜進士授高安令高安素稱難治前令俱被累弗克終不事鞭朴庶務畢舉督造版籍剔弊殆盡民勒石頌之召爲監察御史首劾武定侯驕橫不報然貴戚歛手畏之奉勅巡茶馬于西陲劾去貪墨者數人風裁益著巡按兩浙浙爲東南巨藩錢糧刑獄俱關白而行裁決無滯人服其才事竣回掌

道事行人薛侃上書請如宋仁宗故事擇宗人一子育于宮中疏入建鞠朝堂有朝士希進者傳致某官主使薛被考掠竟無所指法司阿意偏向具疏白之人益稱其直然亦以此遭忌矣尋遷大名府知府後二年轉陝西苑馬寺少卿逆知不爲人所容遂致其事而歸未幾臺諫交薦起爲遼東行太僕寺少卿尋轉河南按察司副使兵備信陽地接三省民多流竄時河內大凶開倉賑濟全活甚衆大司徒王公上其事天子嘉獎三載轉湖廣布政司右叅政召入爲順天府丞甫半載陞右僉都御史巡撫山東值邊境

多事調發輪戍供億不貲悉心料理民不困乏經冬  
無雪民心皇皇乃躬詣泰山竭誠以禱雪乃降晉左  
副都御史協管院事時礦賊未平聞太恭人訃墨衰  
畢事奔歸當道有嫉之者諷言官論劾竟不置辯服  
除事益白以原官巡撫河南鄭王與其宗枝訐奏陰  
私朝廷遣內外大臣勘問事皆倚焉適北虜犯闕集  
兵入援交併一時賴以安定轉戶部右侍郎尋轉左  
總督太倉兼西苑壬子轉南京都察院右都御史掌  
院事有大俠善結納要路侵害客商擒治之以正典  
刑錢法濫惡出令禁治中外凜凜偶感疾卒于官年

六十

邢埴

邢埴字汝器當塗人珣仲子也少負奇資爲詩文下筆數千言立就珣官南曹時永嘉相張公孚敬尚未第延爲埴師三年而學大成遂領嘉靖壬午鄉薦數上春官不第而張已膺大拜矣欲以翰林孔目授之竟束裝歸曰吾舌尚未敝也久之屢蹶公車謁選爲浦城令浦閩饒邑也豪猾多夤緣其上以荼毒里閭長令者少一染指遂入其彀莫可誰何有徐氏而號鷹揚者益搏擊鄉曲之惡名也假以進鯖魚而置金

於內峻却之廉得其不法者數事置於理斃之一邑  
震洗踐更卒徐浦偶從儔衆中奇其狀曰是大有異  
問其年甫十五問其家世則子然一身耳呼至衙廡  
與諸子輩同業延文學周烈課之出聘金爲婚素封  
祖氏之女不數年聯第以去後官給諫有直聲其家  
世世尸祝焉民和政理邑以大治方擬崇轉而浩然  
投劾歸矣時甌寧都御史范嵩作秋輟遐思圖贈其  
行邑勒堅珉以志其績歸時行李不備圖書數卷而  
已退居里中授徒講學暇則詠歌以適志永嘉相累  
招之不赴人以爲剛正恬素有父風焉

胡燿

胡燿字仲光蕪湖人自幼穎悟髫年卽能詩翰家世農從諸弟躬耕盛暑中亦携書以隨暇則坐茂樹中開卷朗誦暮歸仍檢閱不厭雞鳴起讀周易數卦乃出耕以嘉靖癸丑登進士選翰林院庶吉士丙辰拜戶部主事所司錢穀出入惟謹丁巳朝廷以災變求直言抗疏千百言皆戚畹閹宦方士夷狄等事詞意切直僚友危之命下悉宥不數月宦者果以賊敗自是名動縉紳辛酉春奏乞養病卒於家燿狀貌清癯沉靜寡欲孝敬睦愛出於天性該博五經羣史諸子

百家初無師授惟潛心玩索而有所得發爲文章詞賦雄偉精當所著有太學補蒲塘集存焉

邢址

邢址字汝立號陽川當塗人珣季子也少穎異不羣茹素甘澹絕不染貴介習自定省外一意讀書而已爲諸生時構一小樓日研會尋索益務精詣不下樓者三年一出而遂領畿薦登嘉靖壬辰進士授刑部主政有能聲七月卽擢監察御史址修幹偉貌美鬚髯一日侍經筵上問內侍曰願而髯者何官真御史也再扈蹕幸西山有錦帶襪衣之賜會有奏兩廣



諸司帑金累數十年不清查前後相仍爲墨者特詔  
址偕給諫錢薇往磨勘焉至卽封其庫藏盡搜剔其  
蠹弊不遺根穴宿弊清而謗怨騰沸矣出爲寶定守  
址剛介之性卽遭折不磨治郡一以清肅爲主往新  
守至例有茶菓銀八百兩厲色却之以賙寒士堂城  
之間肅然吏抱牘以進唯諾凜凜五伯植立如木偶  
不敢有褻趨而旁睨者時柄相專恣蒼頭輩竊威以  
嚇郡邑吏所過無不頤指以承者至寶定橫恣益甚  
址繫其最黠悍者杖遣之柄相聞而銜之甚遂遷邵  
武守踰年擢山東運使址嘆曰使我脂韋偕俗爲繞

指柔乎自分不能惟有清泉白石知我心耳屢疏致政而歸蕩漾湖光相對自適郡守祝公數以幣請見不答直指游公欲薦之於朝謝愈力自里居後從未有城市之跡焉兩世貴宦產不及中人蓋其清介剛直父子一轍也

### 夏廷美

夏廷美繁昌人下里田夫也性孝友忱恂里人敬信之張甌山以司徒左遷主繁昌教物色之招與講學一日甌山號於會衆曰夫爲學學爲人也爲人湏求爲真人母爲假人廷美憮然內省曰吾平日所修持

爲人者得毋未真耶時時循省求所爲真者已從焦子澹園游漸知向裏久之自信得自然旨趣以書抵焦子商正焦子報書曰要自然便不自然可將汝自然拋去他方世界也于是聞而有言謂其時胸中砉然如洗云平日故未事詩書至是始請于焦子讀何書焦子曰讀四書可乃日取學庸論孟次第咏誦時以已意詮解甚有悟入嘗謂思知人不可不知天仁者人也人原是天人不知天便不是人如何能事親稱孝子又論語所謂異端云者謂其端異也吾人湏是研究自己爲學初念其發端果是爲何乃爲正學

今人讀孔孟書若祇爲榮肥計便是大異端如何又  
闢異端又曰吾人湏是自心作得主宰凡事只依本  
心而行便是大丈夫若爲世味牽引依違從物卽名  
爲學道者不能自信本心勦襲紙上陳言挨傍別人  
口吻此皆孟子所云妾婦道也一日忽喟然曰天理  
人欲不知誰氏作此分別反身細求理欲止在迷悟  
間悟則人欲卽天理迷則天理亦人欲也又嘗謂焦  
子曰吾讀論孟竊思孔孟之學同其道同乃孔子爲  
至聖孟子何未能與擬蓋嘗疑之近日反覆誦思如  
論語篇中孔子自謂未能者七謂何有於我者七乃

孟子七篇更未見有此類語意母乃孔孟之所以別  
乎非與諸所詮解多類此儻所謂以我觀書非以書  
博我者耶有友詢良知指意一友曰良知非究竟宗  
指更有向上一着在無聲無臭是也廷美起立抗聲  
曰良知曾有聲臭耶一坐驚異夫近學之蔽于虛無  
也陷而離矣一下里田叟乃見及此哉

本朝分省人物考卷之四十終